

Evening Dogri News Bulletin,

29 October 2024 18:15 Hrs

Headlines

- गृहमंत्री अमित शाह होरें आखेआ ऐ जे रन फॉर यूनिटी हुन विकसित भारत दा संकल्प बनी गेआ ऐ।
- सुरक्षा बलें जम्मू दे अखनूर सैक्टर च त्रैवें आतंकवादियें गी मारी मकाया ऐ।
- प्रधानमंत्री नरेंद्र मोदी होरें आखेआ जे जिस्सलै देसै दे नागरिक सेहतमंद हुंदे न ते देस तेजिया कन्नै तरक्की करदा ऐ।
- प्रधानमंत्री नरेंद्र मोदी होरें वीडियो कांफ्रेंसिंग राएं 51 ज्हार शा बद्द नियुक्त पत्र सौंपे।

<><><><><><>

Run for Unity

केंद्री गृह मंत्री अमित शाह होरें अज्ज नमीं दिल्ली दे मेजर ध्यान चंद नेशनल स्टेडियम च रन फॉर यूनिटी एकता लेई द्रौड़ गी झंडी दस्सियै रवाना कीता। एहू कार्यक्रम सरदार वल्लभभाई पटेल हुंदी जयंती दे सिलसिले च आयोजित कीते गेदा हा जिंदा जरम 31 अक्तूबर 1875 गी होआ हा। इस मौके बोलदे होई श्री शाह होरें आखेआ जे अज्ज भारत हर क्षेत्र च अगड़ा बदने दी बत्तै पर दुनिया दे सामने मजबूती कन्नै खड़ोते दा ऐ ते एहदी नींह सरदार पटेल होरें रक्खी ही। उनें इस गल्ला पर जोर पाया जे हर क्षेत्र च सरदार पटेल हुंदे नजरिये, बचारें ते सनेअू गी प्रधानमंत्री नरेंद्र मोदी होरें ठोस शकल दिक्ती ऐ। गृह मंत्री होरें आखेआ जे एकता द्रौड़ शड़ा देसै दी एकता गी पक्का करने दा संकल्प नेई ऐ, हुन एहू विकसित भारत दा बी संकल्प बनी गेआ ऐ। सरकारै देयाली दे त्यौहार करियै इसी वीरवार बदले अज्ज आयोजित करोआने दा फैसला लैता हा। केंद्री मंत्री मनसुख मांडविया,

मनोहर लाल, नित्यानंद राय ते दिल्ली दे उपराज्यपाल बी.के. सक्सेना बी. इस मौके उत्थें मौजूद हे। रन फॉर यूनिटी च तकरीबन 8 ज्हार धावकें हिस्सा लैता।

<><><><><><>

Run for Unity Jammu

जम्मू-कश्मीर प्रशासन नै राश्ट्रीय एकता दिवस दे सरबंध्यै च एकता संगंध चुक्की ते रन फॉर यूनिटी दा सरिस्ता कीता। एहू ध्याड़ा सरदार वल्लभ भाई पटेल हुंदे जरम ध्याड़े दे सरबंध्यै च मनाया जंदा ऐ। कार्यक्रम दी शुरूआत गुलशन ग्राउंड थ्वां होई ते एहू द्रौड़ हरि सिंह पार्क जाइए सम्पन्न होई गोई। इसदे च जम्मू दे डिविजनल कमिशन, ए.डी.जी.पी. आनंद जैन ते होरनें अफसरें हिस्सा लैता। इस द्रौड़ च विद्यार्थिएं, मुकामी बसनीकें ते होरनें मन्ने-परमन्ने दे लोकें हिस्सा लैता। आकाशवाणी दे जम्मू थ्वां जिला संवाददाता अंकुश शर्मा कन्नै गल्ल करदे होई डिविजनल कमिशनर होरें आखेआ।

<><><><><><>

Run for Unity Reasi

राश्ट्रीय एकता दिवस दे सरबंध्यै च रन फॉर यूनिटी द्रौड़ ते राश्ट्रीय एकता सरबन्धी संगंध चुक्कने सरबन्धी कार्यक्रम रियासी च बी. अज्ज आयोजित कीता गेआ। एहूदे च विद्यार्थिएं, सरकारी कर्मचारिएं ते मुकामी लोकें हिस्सा लैता। रियासी दे डिप्टी कमिशनर विशेश महाजन होरें रन फॉर यूनिटी द्रौड़ गी खाना करोआया। इस मौके पर एसएसपी रियासी बी. मौजूद हे। इस द्रौड़ दा मकसद सरदार वल्लभ भाई पटेल हुंदे योगदान गी चेत्ता करना ते राश्ट्र दी एकता ते अखंडता प्रति अपनी बचनबद्धता गी दर्शाना ऐ। किट्टे गी संबोधित करदे होई रियासी दे डिप्टी कमिशनर विशेश महाजन होरें आखेआ।

<><><><><><>

Run for Unity Samba

चला'रदे सतर्कता जागरूकता सप्ताह ते राश्ट्रीय एकता दिवस दे सरबंध्यै च जिला प्रशासन साम्बा नै रन फॉर यूनिटी द्रौड़ दा सरिस्ता कीता। एहदी अगुवाई साम्बा दे डिप्टी कमिशनर राजेश शर्मा होरें कीती। इस द्रौड़ च विद्यार्थिएं, जिला अफसरें ते मुकामी लोकें बदी-चढ़िए हिस्सा लैता। एहू द्रौड़ जिला प्रशासनिक परिसर थ्वां शुरू होई ते साम्बा पुलस स्टेशन दे सामने आहले मैदान च जाइए सम्पन्न होई गई। डिप्टी कमिशनर होरें मौजूद प्रतिभागिएं गी राश्ट्रीय एकता संगंध बी दोआई। इस मौके पर बोलदे होई साम्बा दे डिप्टी कमिशनर राजेश शर्मा होरें आखेआ।

<><><><><><>

Terrorist Killed JK

जम्मू च अखनूर सैक्टर दे जंगली इलाके च घेरे च लैते गेदे दऊं होर आतंकवाद गी सुरक्षा बलें टाकरे दौरान मारी मकाया ऐ। एहदे कन्नै गै कब्जा रेखा पर इस टाकरे च मरोने आहले आतंकियें गी गिनतरी 3 होई गई ऐ। स्हाढे संवाददाता नै खबर दिती ऐ जे कल बडुलै इनें आतंकवादियें पर गोलीबारी कीती ही। इनें त्रोंनं इचा इक्क आतंकवादी दा कल सफाया करी दित्ता गेआ हा। टकोहदे बल ते एनएसजी कमांडो आसेआ BMP-II इंफैंट्री दियें गड्डियें दे इस्तेमाल कन्नै रम्भे गेदे अभियानें च आतंकियें गी मारी मकाया गेआ। बाकी द'ऊं गी अज्ज अखनूर सैक्टर दे बटूल इलाके च सेना ते पुलस दियें टीमें आसेआ शुरू कीते गेदे सांझे अभियान च मारे गे। टाकरा खत्म होई गेआ पर मारे गेदे आतंकवादियें दिये लोथें गी बरामद करने आस्तै अभियान अजें जारी ऐ। मन्नेआ जा'रदा ऐ जे एहू आतंकी ऐतवार रातीं सरहद थमां घुसपैठ करियै इत्त बकखी आई गे हे ते बडुलै सेना दे काफले गी नशाना बनाया हा।

<><><><><><>

Army-Equipment

हाल च होए दे आतंकवादी हमले गी दिखदे होई सुरक्षा कर्मियें आसेआ भलेआं, उपकरणें राएं सतर्कता, निगरानीद गी बदाया गेआ ते बन्ने आहले जिले राजौरी ते पुंछ आहले जंगली इलाके च तपाशी ते गश्त बदाई दिक्ती ऐ। अधिकारिएं मूजब पिछले 2 हफ्ते च 7 आतंकवादी हमले होए न। इस हमले च 2 सैनिक शहीद होए ते लोक मारे गए। सेना हर उपाऽ करा'रदी ऐ। रणनीति मूजब गश्त, तपाशी अभियान बी चलाए जा रदे न। आतंवादिएं दी आवाजाई पर तक्क रखने लेई हर सरिस्ता अपनाया जा करदा ऐ। ड्रोन दी सहायता बी लैती जा रदी ऐ। राजौरी ते पुंछ जिले च राश्ट्रीय राइफल्स आसेआ नियमित तौर पर तपाशी ते अभियान चला'रदा ऐ।

<><><><><><>

PM-Ayurveda

प्रधानमंत्री नरेंद्र मोदी होरें अज्ज धन्वंतरि जयंती ते 9में आयुर्वेद दिवस दे मौके पर नमीं दिल्ली च तकरीबन 12 ज्हार 850 करोड़ रुपें दी लागत आहली सेहत क्षेत्र कन्नै जुड़ी दियें नेकां परियोजनाएं दा उद्घाटन ते नींह पत्थर रक्खेआ। श्री मोदी होरें आयुष्मान भारत प्रधानमंत्री जन आरोग्य योजना तैहत 70 ते औदे शा बद्द बरे दी बरेसु आहले वरिष्ठ नागरिकें ताई सेहत कवरेज दे विस्तार दा बी शुभारम्भ कीता। श्री मोदी होरें भारत दे पहले अखिल भारतीय आयुर्वेद संस्थान दे दु चरण दा बी उद्घाटन कीता। उनें मध्य प्रदेश दे मंदसौर, नीमच ते सिवनी च 3 मेडिकल कालजें दा बी उद्घाटन कीता। इंदे अलावा प्रधानमंत्री होरें हिमाचल प्रदेश दे बिलासपुर, पच्छिम बंगाल दे कल्याणी, बिहार दे पटना, उत्तर प्रदेश दे गोरखपुर, मध्य प्रदेश दे भोपाला, असम दे गुवाहाटी ते नमीं दिल्ली च बक्ख-बक्ख एम्स अस्पतालें च नेकें स्थूलतें ते विस्तार दा बी उद्घाटन कीता जिंदे च इकक जन औषधि केंद्र बी शामिल होग। इस मौके पर प्रधानमंत्री होरें छत्तीसगढ़ दे बिलासपुर च सरकारी मेडिकल कालेज च इक्क सुपर स्पेशलिटी ब्लॉक ते उड़ीसा दे बरगढ़ च इये ले क्रिटिकल केयर ब्लॉक दा बी उद्घाटन कीता। प्रधानमंत्री होरें मध्य प्रदेश दे शिवपुरी, रतलाम खंडवा, राजगढ़ ते मंदसौर च 5 नर्सिंग कालजें दा नींह पत्थर रक्खेआ। कार्यक्रम दौरान उनें आयुष्मान भारत सेहत ढांचा मिशन AB HIM तैहत एच.पी कर्नाटक, मणिपुर, तमिलनाडु ते राजस्थान च

21 क्रिटीकल केयर ब्लॉकें ते नमीं दिल्ली ते हिमाचल प्रदेश दे बिलासपुर च एम्स च नेकें स्हूलतें ते सेवा विस्तार दा नींह पत्थर रक्खेआं इस मौके बोलदे होई श्री मोदी होरें आखेआ जिस्सलै देसै दे नागरिक सेहतमंद हुंने न ते देस तेजिया कन्नै तरक्की करदा ऐ। श्री मोदी होरें गलाया जे एहू देसै ताई मान ते खुशी आहली गल्ल ऐ जे आयुर्वेद दिवस 150 शा बद्द देसैं च मनाया जा करदा ऐ।

<><><><><><>

PM-Dhanteras

प्रधानमंत्री नरेंद्र मोदी होरें अज्ज धनतेरस दे मौके पर लोकें गी शुभकामनां दित्तियां न। सोशल मीडिया पर इक्क पोस्ट च श्री मोदी होरें कामना कीती जे भगवान धन्वंतरि हुंदे शीरवाद कन्नै सब्बनें दा जीवन म्हेशां बेहतर सेहत, खुशहाली ते तरक्की बाद्दे कन्नै भरोचे दा रवै। तोआई, श्री मोदी होरें अज्ज आयुर्वेद दिवस दे मौके पर देशवासियें गी ममारकां दित्तियां। सोशल मीडिया पोस्ट च उनें आखेआ जे बेहतर जीवन शैली बनाए रखने आस्तै आयुर्वेद म्हेशां कारी दा साबत होग। प्रधानमंत्री होरें आखेआ जे भगवान धन्वंतरि हुंदी जयंती आयुर्वेद दी उपयोगिता ते योगदान कन्नै जुडी दी ऐ जिसी हुन समूलची दुनिया नै स्वीकार करी लैता ऐ।

<><><><><><>

PM-Rozgar Mela

प्रधानमंत्री नरेंद्र मोदी होरें आखेआ ऐ जे सरकारै आत्मनिर्भर भारत बक्खी नेकां महत्वै आहले कम्म कीते न ते अंतरिक्ष थमां लेइयै बिजली कन्नै चलने आहिलयां इलेक्ट्रिक गड्डियें च नमीं टेक्नोलॉजी सने हर क्षेत्र च मेक इन इंडिया गी बढावा दित्ता ऐ। श्री मोदी होरें आखेआ जे भारत दुनिया दी त्री सब्बनें शा बड्डी अर्थ बवस्था बनने बक्खी अगड़ा बदा करदा ऐ। प्रधानमंत्री होरें अज्ज बक्ख-बक्ख सरकारी मैहकमें ते इदारे च 51 जहार शा बद्द नमें लागे गेदे नौजोआनें गी नियुक्ति पत्र सौंपे। वीडियो कांफ्रेंसिंग रायं कार्यक्रम गी संबोधित करदे होई श्री मोदी होरें आखेआ जे सरकार नौजोआनें गी रोजगार दे बद्द शा बद्द मौके उपलब्ध करोआने लेई बचनबद्ध ऐ। उनें आखेआ जे

सरकार नै प्रधानमंत्री इंटर्नशिप योजना तैहत देसै दिये 500 बड्डिये कंपनिये च नौजोआने आस्तै भुगतान आहली इंटर्नशिप दी पहल कीती ऐ। प्रधानमंत्री होरे गलाया जे सरकार नौजोआने गी लगातार पक्कियां नौकरियां देआ रदी ऐ। उने जोड़ेया जे बीजेपी ते एनडीए शासित राज्ये च ज्हारे बदे नौजोआने गी नियुक्ति पत्र थहोई चुके दे न। श्री मोदी होरे आखेआ जे हरियाणा दी नमीं चुनोई दी सरकारै 26 ज्हार नौजोआने गी रोजगार उपलब्ध करोआया ऐ। आकाशवाणी संवाददाता नै दस्सेआ जे देसै च 40 थाहरे पर रोजगार मेले दा सरिस्ता कीता गेआ। केन्द्र सरकार दे बक्ख-बक्ख मंत्रालय च नियुक्त इने लोके गी कर्मयोगी प्रारम्भ रायं मुंडली सिखलाई हासल करने दा मौका थहोग।

<><><><><><>

Rozgar Mela Jammu

जम्मू दे कन्वेंशन सेंटर च रोजगार मेले दे दुए गेड़ तैहत 105 मेदवारे गी नियुक्ति सरबन्धी चिट्ठियां सौंपियां गेइयां। इने मेदवारे चा मते सारे गी डाक ते भारती रेलवे च नियुक्ति होई ऐ। इस कार्यक्रम च सांसद जुगल किशोर शर्मा होर बी शामिल होए। प्रधानमंत्री नरेन्द्र मोदी होरे नमे नियुक्त कीते गेदे मेदवारे गी वर्चुअल माध्यम राएं संबोधित कीता। रोजगार मेले दे सरबन्धै च 40 थाहरे कार्यक्रमे दा सरिस्ता कीता गेआ ते 51 ज्हार नियुक्ति पत्र भेंट कीते गए। इस मौके पर बोलदे होई सांसद जुगल किशोर शर्मा ते नियुक्ति पत्र हासिल करने आहले मेदवारे ने गलाया।

<><><><><><>